

Ei lo jòc ua activitat meièu reservada aus mainatges ?

E coneishes exemples de jòcs que hèn los adultes en lo nòstre parçan ?

Balha un o dus exemples d'elements naturaus que pòden servir ende fabricar lo materiau per un jòc ?

Se te demandan quin ei lo jòc qu'estimas lo mei, lo quin balharès ? Ei un jòc individuu o un jòc collectiu ?

ACTIVITATS
Jòcs de lenga, formuletas

Teish, teish tishanèr,
Quantas canas en vòs hèr,
Tres, tres, per un dinèr,
A ! Lo brave tishanèr !

Un polet, qu'ei bon a quate :
Los òsses, au can,
Las tripas au gat,
Las plumas au vent,
E lo rèsta, entà jo !!!

Jòcs de dits

Petit didon
Lo memeron
Bota la taula
Trempla la sopa
Tira lo vin
Guiri guiri ! (doigts de la main)

Lo pòrc
La troja
Aqueth qu'a hame
Aqueth que n'a pas
Coiiiiiii ! (doigts du pied)...



Jòc de la marelle

LEXIC

Partenaris : un partenari qu'ei ua persona, un grop, dambe qui l'òm s'associa o l'òm se liga ende realizar ua accion comuna dens un ahar, ua enterpresa, ua negociacion o un projèct.

Transmission : la transmission qu'ei l'accion de hèr passar informacions, coneishenças d'ua persona en ua auta.

Lo jòc qu'ei un element essenciau dens lo desvolopament social, intellectuau e fisic d'un individu. Qu'ei tanben un element estructurant d'ua societat. E donc, l'airau gascon e mes generalement occitan ne i escapan pas.

Que i a plan solide mantuas situacions de jòc, que se pòden « categorizar » de diferentas façons. La quasi totalitat d'entre eths, a despart de las gestualas e de las règlas especificas a cada jòc, emplega tanben la lenga coma mejan de comunicacion : ende causir la persona cargada de començar o de miar lo jòc, ende balhar las consignas o las replicas pròpias a cada situacion, end'aprènguer e memorizar nocions, end'acabar lo jòc... en dus mots, ende « viver lo jòc » en question !

Aqueths jòcs son per la màger part adaptats a l'atge, mès tanben a l'environament. Alavetz, que se poderàn utilizar elements naturaus d'aqueth environament, o tanben fabricar los objèctes necessaris au jòc. Los jòcs son tanben adaptats au nombre deus partenaris : jòcs de règla, de societat : cartas, bòlas, petanca...

L'airau occitan, plan solide, n'a pas escapat a cèrtas evolucions de la societat. « Bèth temps a », daubuns tipas de jòcs èran practicats en familha, pendent las velhadas, las hèstas, o a d'autres moments de la vita (quan los joens mainatges guaitavan los tropèths, per exemple).

Auèi, los lòcs de transmission e d'aprentissatge an cambiat, per rasons diversas : diminucion, o tanben pèrta de la transmission familiar de la lenga, arribada d'autres tipas de jòcs (mei que mei jòcs electronics dempuish quauquas annadas), presa en compte de la transmission de la lenga regionau dens d'autres contèxtes (escòla, associacions, clubs, institucions...). Lo jòc ei lavetz utilizat coma utís d'aprentissatge e de transmission d'elements linguistics e culturaus, e tanben d'ua façon de viver especifica a la nòstra region. E donc, un bon nombre de jòcs son « universalement » coneguts, dambe variantas (lenga, règlas...).

Quauques exemples o tipas de jòcs :

- Jòcs de lenga, comptinas, formuletas...
- Devinalhas,
- Jòcs de dits,
- Rondas, jòcs cantats e dançats, jòcs de perseguida,
- Jòcs de règla, d'estrategia, de societat : ossets / cartas...
- Jòcs de règla deu dehòra : berret / esparvèr / jòcs de bòlas, de quilhas, de paumas, de palet...
- Jòcs d'equilibre, d'agilitat, d'abiletat, d'adreça, parcours (chancapè)...
- Jòcs damb objèctes fabricats : molins, sarbatanas, joguets sonòrs...



Jòc de quilhas

